

e, ua haere te reira no'u. Te tuu atu nei au i te reira i mua ia outou ma te tuu atoa'tu i te opuaraa ia tamata outou i ta'u mau parau, e ia na reira outou, te parau fafau atu nei au e, e riro te reira i te arata'i ia outou i te ma'itiraa maramarama a topahia ai outou i te mau ma'itiraa rau, e e riro atoa te reira i te arata'i ia outou i te mau pahonoraahie i mua i te mau uiraa e faaa-repurepu nei i te taata ite e te feia te mana'o nei ia ratou ei taata paari.

Pinepine roa tatou i te feruri i te haapa'o, mai te pee-afaro-noa-raa i te mau parau faaue e aore râ te mau parau faahepo a te mana faatere i ni'a a'e ia tatou. Te parau mau râ, i to'na faito maitai roa a'e, ua riro te haapa'o ei tapa'o no to tatou faaroo i roto i te paari e te mana o te mana faatere teitei roa a'e, oia ho'i, te Atua. A faa'ite ai Aberahama i to'na faaroo rahi e te aueue ore e to'na haapa'o i te Atua, e noa'tu e, ua faauehia oia ia faatusia i ta'na tamaiti, ua faaora te Atua ia'na. Mai te reira atoa ia no tatou, ia faa'ite atu tatou i to tatou faaroo rahi na roto i te haapa'o, e faaora mai te Atua ia tatou i te pae hopea.

Ratou te turu'i noa nei i ni'a ia ratou iho ma te pee noa i to ratou mau hinaaro e to ratou mau hiaai, e oti'a rahi ia tei mua ia ratou ia faaau-hia i te feia e pee nei i te Atua e o te fana'o nei i To'na mana'o, To'na mana e Ta'na mau horo'a. Te parauhia nei e, « Te taata tei puohuhia ia'na ana'e iho, e pu'ohu na'ina'i roa ia te oti mai ». E ere roa'tu ia te haapa'o ma te puai e te rohi itoito i te ohipa paruparu e te faaea noa. E ma'itiraa te reira i rotopu i to tatou ite e to tatou mana taoti'a, e te paari e te puai rau taoti'a ore a te Atua. Ia au i te haapiiraa a to'u papa ruau, e ma'itiraa te iteraa i te tavaha pae varua i roto i to tatou vaha e te peeraa i te arata'iraa a te taata faahoro.

Ia riro mai tatou ei taata ai'a no te fafauraa e te huero o Aberahama na roto i to tatou faaroo rahi e na roto i te fariiraa i te mau oro'a o te evanelia tei faaho'i-faahou-hia mai. Te parau fafau nei au ia outou e, ua matara noa te mau haamaitiraa o te ora mure ore i te taata faaroo rahi e te haapa'o. Na roto i te i'oa o Iesu Mesia, amene. ■



Na Elder Lawrence E. Corbridge
No te Hitu Ahuru

Te peropheta Iosepha Semita

Na te mau heheuraa i manihia i ni'a ia Iosepha Semita e haapapû nei e, e peropheta oia na te Atua.

Te Orama Matamua

Ua tai'o te hoê tamaiti iti i te Bibilia, e ua haru mai to'na mata i te hoê irava papa'iraa mo'a. E taima teie o te tau i te ao nei.

Ua pe'ape'a rahi oia ia itehia mai ia'na te ekalesia e nehenehe e arata'i ia'na i te parau mau e i te faaoraraa. Ua tamata oia i te mau mea atoa, e i teie nei, ua hi'o oia i roto i te Bibilia ma te tai'o i teie mau parau: « Te ere

ra râ te hoê o outou i te ite, e ani oia i te Atua ra, o tei horo'a hua mai i te maitai i te taata'toa ra, ma te pato'i ore ; e e horo'ahia mai ta'na ».¹

Ua feruriruri oia i te reira, faahou e faahou â. E maramarama iti te hiti maira i roto i te poiri. O teie anei te pahonoraahie, te e'a e mahuti mai i rapae i te ahuehue e te poiri ? Atae ho'i ohipa ohie ? E ani noa i te Atua e e pahonohia mai ? I te hopearaa, ua faaoti oia e ani i te Atua e aita ana'e, e faaea noa ia i roto i te poiri e te ahuehue.

E teie râ, noa'tu â to'na pe'ape'a iti rahi, aita oia i horo noa i te hoê vahi a faahiti ru noa'tu ai i ta'na pure. E 14 matahiti noa to'na, e noa'tu to'na hinaaro rahi ia ite, aita oia i ru noa. E ere ho'i te reira i te hoê noa pure iho. Ua faaoti oia i te vahi e i te taima no te tamata. Ua faaineine oia no te paraparau i te Atua.

E, tae mai nei taua mahana ra. E po'ipo'i nehenehe e te maramarama, i te omuaraa o te tau faatupuraa raau i te matahiti [1820].² Ua haere oia, ona ana'e, i roto i te hau o te hoê uru raau fatata i te fare, i raro ae i te marû o te mau tumu raau e hi'o mai nei ia'na. Ua tae oia i te vahi ta'na i faaoti ia haere. Ua tuturi i raro e ua pûpû i te hiaai o to'na aau.





No te faa'ite i te ohipa i tupu i muri iho, teie ta'na iho mau parau :

« Ua ite atura vau i te pou maramarama i te faaatiraa i ni'a noa a'e i to'u upoo, e ua pou maira te reira i ni'a iho ia'u

« ... I te ma'iriraa taua maramarama ra i ni'a iho ia'u, ua ite atura vau e piti taata ; to raua teatea e te hanahana a ti'a noa'i raua i ni'a a'e ia'u i roto i te reva ra, e ore roa ia e ti'a ia faaauhia i te hoê noa'tu mea. Ua parau maira te hoê o raua ia'u, ma te faatoro atu i to'na rima i ni'a i te tahi, e ma te faahiti i to'u i'oa, i te na ôraa mai e— [Iosepha,] *O Ta'u Tamaiti Here Teie, A faaroo Ia'na!* »³

24 noa matahiti i muri iho, ua pohe Iosepha Semita e to'na taea'e Hyrum no teie ohipa i omua i ô nei.

Pato'iraa

Te parau nei Iosepha e, i te 17raa o to'na matahiti, ua parau mai te hoê melahi ia'na e, « e haamaitaihia e e faainohia [to'na] i'oa i rotopu i te mau nunaa atoa... i te mau taata atoa ».⁴ Te tupu noa nei â teie parau tohu a parare ai Te Ekalesia a Iesu Mesia i te Feia Mo'a i te Mau Mahana Hopea Nei na te ao atoa nei.

Te pato'iraa, te faahapahaparaa e te umeumeraa, e mau apiti te reira no te

parau mau. I te taima atoa e heheuhia mai te parau mau no te maitai e te hopea o te taata nei, e hiti atoa mai te puai no te pato'i i te reira. Mai te tau mai â te reira o Adamu raua Eva i roto i te ô i Edene, e hee mai i te tau taviniraa o te Mesia e tae roa mai i teie nei mahana. I vai noa na e e vai noa'tu te tautooraa no te haavarevare, no te ruri ê, no te pato'i e no te faaore i te faanahoraa no te ora.

Ahani, e imi na tatou i te ata repo rahi roa a'e e te havahava tei maniihia i ni'a i te Hoê tei pato'ihia, tei faati'ohia e tei vahavahahia, tei taparahihia, tei faaru'ehia e tei faasataurohia, te Hoê tei pou i raro a'e i te mau mea atoa. I reira outou e ite mai ai i te parau mau, te Tamaiti a te Atua, te Faaora o te taata nei. No te aha aita ratou i vaiho noa Ia'na ?

No te aha ? No te mea o Oia te parau mau, e e riro noa te parau mau i te pato'ihia.

I muri iho, a imi na i te hoê tei faatae mai i te tahi faahou ite no Iesu Mesia e te tahi faahou papa'iraa mo'a, a imi na i te hoê tei riro ei mauihaa no te faaho'i faahou mai i te evanelia e te Ekalesia a Iesu Mesia i ni'a i te fenua nei, a imi na ia'na, e inaha, e ite mai outou i te ata repo. No te aha eiaha e vaiho noa ia'na ?

No te aha ? No te mea ua haapii oia i te parau mau, e e riro noa te parau mau i te pato'ihia.

Te diluvi heheuraa

Na te mau heheuraa i maniihia i ni'a ia Iosepha Semita e haapapû nei e, e peropheta oia na te Atua. E hi'o na tatou i te tahi o ratou—e hi'o na i te tahi o te mau maramarama e te mau parau mau tei heheuhia mai na roto ia'na, o te anaana roa nei i mua i te mau ti'aturiraa tei mâtauhia i to'na ra tau e i to tatou atoa nei :

- E tino faateiteihia to te Atua, e Metua Mure Ore. O Oia to tatou Metua.
- E mea taa ê te tino o te Atua te Metua, i to Iesu Mesia e i to te Varua Maitai.⁵
- Ua hau atu â outou i te taata noa. E tamarii outou na te Atua, te Metua Mure Ore e e ti'a ia outou ia riro mai Ia'na ra te huru⁶ mai te peu e roaa ia outou te faaroo i roto i Ta'na Tamaiti, e tatarahapa outou, e farii outou i te mau oro'a, e farii outou i te Varua Maitai e e faaoromai noa outou e tae noa'tu i te hopea.⁷
- E mea tu'ati te Ekalesia a Iesu Mesia i to tatou nei anotau, i tera


Ta'na i faanaho i te tau a tavini ai Oia i te tahuti nei, te vai ra te mau peropheta e te mau aposetolo, te mau autahu'araa a Melehizedeka e a Levi, te mau peresibutero, te mau tahu'a rahi, te mau diakono, te mau haapii, e te mau episekopo e te hitu ahuru, mai tei faataahia i roto i te Bibilia.

- Ua iriti-ê-hia te mana autahu'araa mai ni'a i te fenua nei i muri iho i te poheraa te Faaora e Ta'na mau aposetolo, e ua faaho'i-faahou-hia mai te reira i to tatou nei anotau.
- Aita te heheuraa i ore, e aita te ra'i i opanihia. Te paraparau nei te Atua i ta'na mau peropheta i teie nei, e e paraparau atoa'tu Oia ia outou e ia'u nei.⁸
- E ohipa rau atu â e vai ra i muri mai i teie nei oraraa, e ere te ra'i e o hade ana'e. E toru huru hana-hanaha e vai ra, e e mea faufaa mau te ohipa ta tatou e rave nei i roto i teie oraraa.⁹
- Hau atu i te ti'aturi-parahi-noa-raa i te Mesia, e ti'a ia tatou ia « hi'o [Ia'na] i to [tatou] mau mana'o atoa », ¹⁰ « te mau mea atoa ta [tatou] e rave, e rave ia... na roto i te i'oa o te Tamaiti », ¹¹ ia « haamana'o â ia'na e a muri noa'tu, ma te haapa'o maitai i ta'na mau faaue... ia vai noa to'na varua i roto ia [tatou] ». ¹²
- Aita i mo'e te rahiraa milia taata, tei ora e tei pohe ma te ore i teie i te evanelia e te mau oro'a i titauhia no te faaoraraa. Na roto i te Taraeharaa a te Mesia, pauroa te taata e « faa-orahia, na roto i te haapa'oraa i te mau ture e te mau oro'a o te Evanelia », ¹³ o te faaterehia nei no te taata ora e no te taata pohe ho'i. ¹⁴
- E ere te fanauraa te haamataraa. I ora na outou na mua a'e i mua i te aro o te Atua, ei tamaiti e ei tamahine Na'na, e ua faaineinehia outou no teie oraraa tahuti nei. ¹⁵
- E ere te faaipoiporaa e te utuafare i te hoê faaauraa noa na te taata, e tae noa'tu e faataa mai te pohe ia tatou. E mau faaauraa tei opuahia ia vai mure ore na roto i te mau fafauraa ta tatou e rave i mua i te Atua. E hoho'a te utuafare no te ra'i. ¹⁶

E tuhaa rii noa te reira no te diluvi heheuraa tei manihia i ni'a ia Iosepha Semita. No hea mai te reira, teie mau heheuraa e horo'a nei i te maramarama i te poiri, te papûraa i te feaa e o tei faa-ûru e o tei haamaitai e rave rahi milioni taata ? Eaha ho'i, ua moemoea anei oia i te reira mau mea e aore râ na te ra'i anei i horo'a mai ? Eaha te huru ta'iraa o te mau papa'iraa mo'a ta'na i tuu mai, e reo anei na te taata e aore râ na te Atua ?

Puohuraa

Aita e mârôraa no ni'a i te ohipa ta Iosepha Semita i rave maori râ, nahea oia i te raveraa i te reira, eaha ta'na i rave e no te aha. Inaha, aita e pahonoraahi i reira. E taata faahua anei e aore râ e peropheta. E mea na roto anei ia'na iho e aore râ na roto i te tautururaa a te ra'i. A hi'o i te mau haapapûraa, a hi'o râ i te taatoaraa o te haapapûraa, te mau tuhaa atoa o to'na oraraa, eiaha te hoê noa pae. Hau atu râ, a rave mai ta te tamaiti apî ra o Iosepha, e a « ani... i te Atua



ra, o tei horo'a hua mai i te maitai i te taata'toa ra, ma te pato'i ore ; e e horo'ahia mai [ta outou] ». ¹⁷ E ere te reira i te rave'a no te ite noa mai i te parau mau no ni'a i te Buka a Moromona e Iosepha Semita, o te hoho'a râ e itehia mai te parau mau o te mau mea atoa. ¹⁸

E peropheta Iosepha Semita na te Atua, mai Thomas S. Monson atoa i teie mahana. Na roto ia Iosepha Semita, faahou â, « ua [horo'a-faahou-hia mai] te mau taviri no te basileia o te Atua i te taata nei i ni'a i te fenua nei, e mai reira atu te evanelia e tere atu ai... mai te ofai i ootihia no roto mai i te mou'a ma te rima ore... e tae noa'tu i te taimi e î ai te ao nei i te reira ». ¹⁹

O te Atua to tatou Metua Mure Ore, e o Iesu te Mesia. Te haamori nei tatou ia Raua. Aita e mea no te faaau i ta Raua mau hamaniaraa, te faanahoraa no te faaoraraa e te tusia taraehara a te Arenio a te Atua. I roto i teie tau tuuraa, te rave faaoti nei tatou i te faanahoraa a te Metua, e e rave atu tatou i te mau hotu no te Taraehara na roto ana'e i te haapa'oraa i te mau ture e te mau oro'a o te Evanelia tei faaho'i-faahou-hia mai e te peropheta Iosepha Semita. Te horo'a'tu nei au i to'u iteraa papû no Raua—te Atua te Metua Mure Ore e Iesu Mesia te Faaora o teie nei ao. E te na reira nei au na roto i te i'oa o Iesu Mesia, amene. ■

TE MAU NOTA

1. Iakobo 1:5.
2. Iosepha Semita—Aamu 1:14.
3. Iosepha Semita—Aamu 1:16–17.
4. Iosepha Semita—Aamu 1:33.
5. Hi'o Te Parau Haapiiraa e te Mau Parau Fafau 130:22.
6. Hi'o Te Parau Haapiiraa e te Mau Parau Fafau 50:24.
7. Hi'o 2 Nephi 31; 3 Nephi 27.
8. Hi'o Moroni 10:3–5.
9. Hi'o Te Parau Haapiiraa e te Mau Parau Fafau 76.
10. Te Parau Haapiiraa e te Mau Parau Fafau 6:36.
11. Mose 5:8.
12. Te Parau Haapiiraa e te Mau Parau Fafau 20:77.
13. Te mau Hiro'a Faaroo 1:3.
14. Hi'o Te Parau Haapiiraa e te Mau Parau Fafau 76; 128 ; 138.
15. Hi'o Te Parau Haapiiraa e te Mau Parau Fafau 49:17; 138 ; Mose 3:5; 6:36.
16. Hi'o Te Parau Haapiiraa e te Mau Parau Fafau 131:1–2 ; 132:5–33.
17. Iakobo 1:5.
18. Hi'o Moroni 10:3–5.
19. Te Parau Haapiiraa e te Mau Parau Fafau 65:2.